

МЕСЯЦА ЯНВАРЯ В 30-ЫЙ ДЕНЬ.

ИЖЕ ВО СВЯТЫХ ОТЦЕВ НАШИХ И ВЕЛИКИХ ИЕРАРХОВ ВАСИЛИЯ ВЕЛИКАГО, ГРИГОРИЯ БОГОСЛОВА И ИОАННА ЗЛАТОУСТАГО.

И СВЯТАГО СВЯЩЕННОМУЧЕНИКА ИППОЛИТА, ПАПЫ РИМСКАГО

ВОЗСЛЕДОВАНИЕ СВЯТАГО СВЯЩЕННОМУЧЕНИКА ИППОЛИТА, ПАПЫ РИМСКАГО,
ПОЕТСЯ НА ПОВЕЧЕРИИ.

НА МАЛОЙ ВЕЧЕРНИ

Стихиры на 4, глас 4.

Подобен: Яко добля:

На высоту, Василлие, * Христовы любве возшед, * узрел еси неизреченныя Его * и Божественныя тайны, * яже открыв, изъяснил еси людем, * яко благочестия проповедник мудрый. * Темже моли от тли и бед избавитися * верно возследующим * твоим учением, преподобне.

Связания разрешил еси ересей, преподобне, * мудростию словес и учений твоих * и во единомыслие собрал еси * православныя веры * в благоразумии Христа хвалящая, Григорие. * Егоже моли * от тли и бед избавитися * верно приемлющим твоя Боговещанная учения.

Неразоримо ты основание * Христос утверди * Своей Церкви, отче преподобне, * соблюдающая сию непозыблему и необориму вражиими прилоги, * Богоглаголиве Златоусте, * и молящаяся от страстей душетленных избавитися * жаждущим твоих словес и пучины разумений.

Троицы избрание, * нетленного же злачника цветы мировоннии * и зело краснейшии, * мысленного же яко суще солнца лучи, * просвещающая землю * своими Божественными осиянии, * да восхвалим Иоанна великаго * с Божественным Богословом Григорием * и высокоумнаго Василия.

Слава, глас 6:

Человецы Божии и вернии раби, * служителие Господни, мужие желаний, * сосуди избранныи, столпи и утверждения Церкви, * Царствия наследницы, * не премолчите еже вопити о нас ко Господу.

И ныне: Богородице, глас 6:

Богородице, Ты еси лоза истинная, * возрастившая нам Плод живота: * Тебе молимся, молися, Владычице, * со святыми апостолы, * помиловати души наша.

На стиховне стихиры, глас 6.

Подобен: Трдневен:

Благодать превозможе, * вера преукрепися, * исполнишася вся разума Божия * апостолов и учителей ради, * и спасением обогатихомся.

Стих: Восхвалятся преподобнии во славе * и возрадуются на ложах своих.

Небесных таинств * и человеческих учений, * благодатей стечение всеразличных со исправленьми, * побеждающими всяко еретическое слово, * три святыя Твоя удивил еси, Господи.

Стих: Священницы Твои облекутся в правду, * и преподобнии Твои возрадуются.

Василий, Божественный ум, * Григорий, Божественный глас, * Иоанн, всекрасный светильник, * трие высочайшии угодницы Троицы и служителие * да прославятся.

Слава, глас 6:

Добрии раби, блазии и вернии, * блазии делателие винограда Христова, * иже и тяготу дневную понесшии, * и данный вам талант возрастившии, * и по вас пришедшим незавидевшии, * темже и врата вам Небесная отверзошася. * Вшедше убо в радость Владыки Христа, * молитте о нас, святиии учителие.

И ныне, Богородичен, глас 6:

Никтоже, притекаяй к Тебе, * посрамлен от Тебе исходит, * Пречистая Богородице Дево, * но просит благодати и приемлет дарование * к полезному прошению.

Тропарь, глас 4:

Яко апостолов единоправнии * и вселенная учителие, * Владыку всех молитте * мир вселенной даровати * и душам нашим велию милость.

Слава, и ныне, Богородичен.

Еже от века утаенное, * и ангелом несведомое таинство: * Тобою Богородице сущым на земли явися Бог, * в неслитном соединении воплощаемь, * и крест волею нас ради восприим, * имже воскресив первозданнаго, * спасе от смерти души наша.

На Велицей Вечерни

Блажен муж: 1-й антифон. На Господи, возвах: стихиры на 8, глас 4.

Подобен: Яко добля:

Благодати органы, * гусли Духа, * благознаменитыя трубы проповедания, * страшныя и достослышанныя, * с высоты шумящия громы * и славу Божию сказующия концем * три проповедники великия Троицы, * Иоанна и Василия * достойно с Григорием прославим.

Троицы поборницы, * благочестия забрала, * иже по дванадесятих трие апостоли, * из Едема точащия воду живушую реки * и лице земли животочными напаяющия * Божественными струями, * великия стихии, * веру, якоже тварь, составльшия, * достождно да почтутся.

Не суть речи, глаголет, * ниже словеса глаголема, * ихже не слышатся гласи их: * во всю землю бо и море * вещание протече * Божественных и мудрых учителей твари. * Отонудуже изряднейшия * тех Божественными законы содержатся и собираются * во едино Православие концы.

Органы Духа Святаго, * истинныя трубы, * ритори Слова * восхвалим песненными гласы, * догматом их возследующии, * молящеся им, * яко дерзновение имущим ко Господу, * даровати мир крепкий убо присно вселенней, * нам же всем прощение.

Ины стихиры, глас 2.

Подобен: Киими:

Киими похвальными венцы венчаем учителя, * разделенныя телесы и совокупленныя духом? * Богоносныя предстатели Троицы Единочисленныя и служители, * светила, вселенную просвещающия, * церковныя столпы, * яже венцы славы, яко победившия, * венчает Христос Бог наш, * имей велию милость.

Киими песненными добротами * венчаем Богоносныя Небесныя таинники и проповедники? * Православия сущия зело изряднейшия Богословы: * Великаго священноявленнаго Василия, * Божественнаго Богоглаголиваго Григория * и Иоанна, зело златаго языком, * яже прослави Троица достойно, Господь, * имей велию милость.

Киими похвальными глаголы похвалим святители, * равноапостольныя благодатию * и единочестныя дарованьми? * Нечестия разорители, * спасители и наставники словом и делом, * пастыри Христоподобныя верою, * земныя Ангелы, Небесныя человеки, * яже почествова Христос славы Господь, * имей велию милость.

Киими похвальными венцы венчаем Златослова, * вкупе с Василием Григория? * Честная приятелица Духа, * твердыя веры поборники, * столпы Церковныя, верных утверждение, * всех согрешающих утешение, * источники, точащия воду, * от неяже почерпающе, услаждаемся душами, * просяще прощения прегрешений * и велия милости.

Слава, глас 6:

Тайныя днесь Духа трубы, * Богоносныя отцы да восхвалим, * воспевшия посреде Церкви песнь сличную Богословия, * Троицу Едину непременную, * Существо же и Божество, * низложители Ариевы и православных поборники, * молящияся всегда Господу * помиловатися душам нашим.

И ныне, Богородичен, глас 6:

Кто Тебе не ублажит, Пресвятая Дево; * кто ли не воспоет Твоего Пречистаго Рождества; * безлетно бо от Отца Возсиявый Сын Единородный, * Тойже от Тебе, Чистыя, пройде, * неизреченно воплощя: * естеством Бог сый, * и естеством быв Человек нас ради, * не во двою лицу Разделяемый, * но во Двою Естеству * неслитно Познаваемый. * Того моли, Чистая, Всеблаженная, * помиловатися душам нашим.

Вход. Прокимен дне. И чтения.

Второго закона чтение (глава 1):

Во днех оных рече Моисей к сыном Израилевым: видите, предах пред лицом вашим землю, вшедше, наследуйте ю, юже клятся Господь отцем вашим, Аврааму, и Исааку, и Иакову, дати им и семени их по ним. И рекох к вам во время оно, глаголя: не возмогу един водити вас. Господь Бог ваш умножил вы есть, и се есте днесь, яко звезды небесныя, множеством. Господь Бог отец наших да приложит вам, яко да будете тысящами сугубо, и да благословит вас, якоже глагола вам. И взял от вас мужи мудры, и художны, и смысленны, и поставих их владети над вами, тысященачальники, и стоначальники, и пятидесятоначальники, и десятоначальники, и писмовводители судиям вашим, и заповедах судиям вашим во время оно, глаголя: разслушайте посреде братьий ваших и судите праведно, посреде мужа, и посреде брата его, и посреде пришельца его. Да не познаете лица в суде, малому и великому судиши, и не устыдишися лица человеческого, яко суд Божий есть.

Второго закона чтение (глава 10):

Во днех оных рече Моисей к сыном Израилевым: се Господа Бога твоего небо и Небо небесе, земля и вся, елика суть на ней. Обаче отцы ваши произволи Господь любити их и избра семя их по ним, вас, паче всех язык, в день сей. И обрежете жестосердие ваше, и выя ваша не ожесточите ктому. Ибо Господь Бог ваш, Сей Бог богов и Господь господей, Бог великий, и крепкий, и страшный, Иже не дивится лицу, ниже возьмет дар. Творяй суд пришельцу, и сиру, и вдовице и любит пришельца, дати ему хлеб и ризу. И возлюбите пришельца, пришельцы бо бесте в земли Египетстей. Господа Бога твоего да убоишися, и Тому Единому послужиши, и к Нему прилепишися, и Именем Его кленешися. Той хвала твоя, и Той Бог твой, Иже сотворил ти есть великая и славная сия, яже видесте очи твои.

Премудрости Соломона чтение (глава 3):

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их, и еже от нас шествие – сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему. Яко благодать и милость в преподобных Его и посещение во избранных Его.

На литии стихиры, глас 2. Нила Ксанфопула:

Приидите, Небесныя Троицы служителие, * земную троицу святых иерархов да восхвалим: * Василия, царствия тезоименнаго, * Григория, Богословии наименовнаго, * и Иоанна, воистинну благодатноименовнаго, * глубины мудрости Духа испытавших, * струи океановы, источники приснотекуция, * воду живу скачущую, * прозарныя бисеры, земная светила, * Церковная кормила, светлоплодовитая дресева, * строители благодати, * Христа моего уста * и Троицы поборницы, * от Нея несредственно осияваемыя * и молящияся непрестанно о душах наших.

Возжженная угля от Нестерпимаго Огня, * иже теми просветившеса, * верно да восхвалим: * тии бо, еже к Нему соединением разжегшеса, * светильницы мира быша, * животная нищим показавшеса сила, * Отца, и Сына, и Святаго Духа * благочестно яве проповедаша. * Имже и мы да прирцем: * радуйся, Троицы троице Богомудрая.

Глас 6:

Троице Святая и покланяемая, * слава мудрому промыслению Твоему, * яко три великия светильники человеком от человек даровала еси, * светом просвещающии Твоего познания * и зарею осияющии спасительных Твоих и честных хотений, * имиже вселенная, светом разума обогащающися, * Твоею славою осияваема есть * и к блаженному Твоему Царствию тщится. * Тех нас Божественных послушати увещающии учений, * и Сама, Троице Святая, * молитв тех, яже о нас, услыши, * яко Бог Всецедрый, * и души наша спаси, Человеколюбче.

Слава, глас 6:

Святители Христовы и отцев славу, * столпы веры и верных учителя и хранители, * сошедшеса, о празднолюбцы, * песненными похвалами воспоим, глаголюще: * радуйся, Церковное светило, * Василие премудре, и столпе непревратный; * радуйся, уме Небесный, * архиерею превеличайший, Богослове Григорие; * радуйся, о Златослове, всезлатый Иоанне, * покаяния ясный проповедниче. * Но, о отцы пребогатии! * Не престаите присно молитися Христу * о верою и любовию совершающих * ваше всесвященное и Божественное торжество.

И ныне, Богородичен, глас тойже:

Девственную доброту, и умное веселие, * едину Богородицу, * и верных твердую ограду, * сошедшеса, о празднолюбцы, * песненными похвалами воспоим, глаголюще: * радуйся, Мати Дево Чистая, * светильниче светозарный и дверь Небесная; * радуйся, скиние священия, * Бога вмещающая во утробе Твоей, Всечистая; * радуйся, всех Небесных чинов превышшая без разсуждения. * Темже, Мати безмужная, Владычице, * не престаи хранящи рабы Твоя, * верою и любовию воспевающия Тя присно * и Рождеству Твоему покланяющияся безсеменному.

На стиховне стихиры, глас 1.

Подобен: Всехвальнии мученицы:

Таинники духовныя вкупе, * словесныя трубы Божия, * Божественная зеркала * восхвалим днесь достойно, * Великаго Василия, * Божественнаго и огнедохновеннаго Григория, * точащаго златоструйнаго учения нам * Иоанна, истинно Златоустаго.

Стих: Восхвалятся преподобнии во славе * и возрадуются на ложах своих.

Степень веры, * ум Божественный и бодрый, * река златоструйная, * всесветлейшии и честнии светильницы, * Троицы поборницы, * приятелища благодатей Духа, * столпи непоколебленнии, * Церкви утверждения * достойно песньми да восхвалим.

Стих: Священницы Твои облечутся в правду, * и преподобнии Твои возрадуются.

Духа органы, * грома Божественного трубы, * молнии проповедания, * свещницы всесветлии, * златии и светоноснии о Бозе, * треблаженне Василие, * Григорие всеумудре, * всезлате и всечестне Иоанне, * чествующия вас спасти Христа молите.

Слава, глас 2:

Днесь души земнородных возносятся от земных, * днесь Небесныя бывають в памяти святых, * ибо врата Небесная вземлются, * и нам Владычния сказуема бывають, * Слова словеса проповедуют, * и языки чудеса поют. * Мы же ко Спасу возошем: * слава Тебе, Христе Боже, * верным бо мир теми бысть.

И ныне, праздника:

Днесь Христос во святилище приносится яко Младенец, * днесь под законом бывает, * Иже Моисею закон давай. * Ангельская удивишася воинства * на руку старческу Держиму, * Иже всяческая Содержащаго зряще. * Симеон говения исполнен быв * и радостне вопияше: * ныне отпусти мя, Спасе, от привременнаго живота * к нестарееющемуся покою: * видех бо Тя и возвеселихся.

На благословении хлебов тропарь, глас 4:

Яко апостолов единоправнии * и вселенныя учителяе, * Владыку всех молите * мир вселенней даровати * и душам нашим велию милость. (Дважды)

И Богородице Дево, радуйся: единожды.

НА ПОВЕЧЕРИИ

Поется возследование священномученика Ипполита

Канон, глас 4. Иоанна монаха.

Песнь 1

Ирмос: Колесницы фараоновы * и силу его вверже в море Крепкий во бранех. * Воспоем песнь новую, яко прославися.

Грядите, мученическими воспоем песнями священномученика, Богозарною зряще благодатию светло просиявша, Христа славяще всегда.

Ты за стадо словесное, от Христа врученное, Сего подражая, в беде сущия изрядне, отче, душу положил еси и сугубым венцем украсился еси.

Священным от повеления Божия радования помазався елеем мученическим, Ипполите, назнаменался еси кровию.

Богородичен: Неопальну Моисей в горе Синайстей купину зряще, Тя прописавшую, Дево, зарею неопальшуся Божественного огня, ибо Бога родила еси.

Песнь 3

Ирмос: Лук сильных изнеможе, * и немощствующие препоясашася силою, * сего ради утвердися в Господе сердце мое.

Агнцы словесныя упасл еси и, якоже агня овец, предпожертвася еси, всех Первопастыря и Божия Агнца подражая.

Млеко словесным, Ипполите, пасомыя Богодохновенно напоил еси, Христова же свидетельства, радуяся, испил еси чашу.

Соборы страдальцев водяй, за благочестие приял еси мучение, единого слава Бога Отца с Сыном и Божественным Духом.

Богородичен: Радуйся, Мати Неискусобрачная, яже Бога Слова во утробе Твоей вместившая и рождающая Воплощенного, яко Бога купно и Человека.

Песнь 4

Ирмос: Твоего на земли явления, Христе Боже, * проповедавая пророк пришествие, с веселием вопияше: * слава силе Твоей, Господи.

Добродетелей твоих яко многоплетенная Божественная пленица, яко пастырь бо и свидетель, Ипполите, от Бога почитовался еси, зело о Нем веселяся.

Приношение Авелево превозшел еси, словесныя бо агнцы привел еси Богу, и твоею кровию, радуяся, Владыце предстал еси.

Еретическую паки глагольную зломыслию Духом победив, блаженне, священномученик изряден любовию Владыки был еси.

Богородичен: Яко видеша Ангели, Дево Чистая, от утробы Твоея произшедшаго Сына Божия, с веселием глаголаху: слава Рождеству Твоему, Владычице.

Песнь 5

Ирмос: Ты, Господи, мой Свет, * в мир пришел еси, * Свет Святыи, обращающий из мрачна неведения * верою воспевающий Тя.

Ты мученик истинен священником был еси и мучеником святитель и сугубыми блистаеши дарованьи, Ипполите.

Камень убо златозарное и лепотное, Исполите, зарю же твоего священноначальства украсит твое страдание.

Басни еллинския благочестно ты изблещил еси, о изрядне в мученицех! и прееззаконную лещь евреев Божественною благодатию.

Богородичен: Тя оружие непобедимое на враги предлагаем, Тя, упование и надежду нашего спасения, Богоневесто, стяжашом.

Песнь 6

Ирмос: Пожру Ти со гласом хваления, Господи, * **Церковь вопиет** Ти, * **от бесовския крове очищися** * ради милости от ребр Твоих истекшею кровию.

Пожерл еси Спасу жертву хваления в Церкви преподобных, яко Богу ходатай же и человеком, и усердно душу твою привел еси кровию.

Прият еси дарований множество Духом, священномучениче, от Бога во отверзении Божественных устен твоих и приводиши, благодарно тебе умерщвляя.

Яко Божественно страдальцев Твоих, Христе, собрание, о надежди лежащих, яко настоящими уже питающесе, и сладчае жизни вмещающим смерть.

Богородичен: О, чудо, всех чудес новейшее! Яко Дева, во утробе всяческая Содержащаго неискусомужно зачещи, не тесновмести.

Седален, глас 1.

Подобен: Гроб Твой, Спасе:

Светильник присносиянен явился еси миру, * просвещая молниями Божественных твоих словес * верных помышления, святителю Исполите. * Темже вси священную твою и Божественную память * днесь радостно совершаем и верно почитаем.

Песнь 7

Ирмос: Спасый во огни авраамския Твоя отроки * и халдеи убив, * яже правда праведно уловяше, * **препетый** Господи, * **Боже отец наших, благословен еси.**

Мученическими светлостьми и священническими просвещаши, священномучениче явленне, вопиющия Христу в памяти твоей: препетый Господи, Боже отец наших, благословен еси.

Предведящаго издалежа страдание священнейшее, отче, мучения зря, предстояща тебе, радуяся, зывал еси: препетый Господи, Боже отец наших, благословен еси.

Раны претерпев от разжженных любве мучения, терпеливно со дерзновением вопиаше Исполит: препетый Господи, Боже отец наших, благословен еси.

Богородичен: Безсеменно во утробе и преестественно приемшую непременного Бога, за милосердие к человеком пришедша, препетый Господи, Боже отец наших, благословен еси.

Песнь 8

Ирмос: Во образе Ангела являшагося в печи огненной песнословцем * **Христа** Бога пойте, отроцы, * **священницы, благословите, * людие, превозносите во вся веки.**

Яко мягка и тучна жертва: добрый бо пастырь, яко овча, приводится Христу, взывая: священницы, благословите, людие, превозносите во вся веки.

Мученическим венцем блистая, Церкви Твоей, Христе, иерарх возсия, пойте, отроцы, радуясь, взывая, людие, превозносите во вся веки.

По прещеннем ответе смертнем Христов страдалец, радуясь, Исполит вопияше: отроцы, Христа благословите, людие, превозносите во вся веки.

Богородичен: **Н**еизглаголанно и безсеменно заченшую и Рождшую радость вселенней, Христа Бога, пойте, отроцы, священницы, благословите и превозносите во вся веки.

Песнь 9

Ирмос: **Р**ождество Твое нетленно явися: * Бог из боку Твоею пройде, * яко плотоносец явися на земли * и с человеки поживе. * Тя, Богородице, тем вся величаем.

Яко всеславен свящennomученик, сугубою уяснил еси зарею Христову Церковь и веселиши сердца тя поющих. Темже ты вси достойно блажим.

Источник источив учений, всеблаженне, Христове Церкви, из мученических кровей потоки речно Богу приносиши, темже ты вси блажим, Исполите.

Научил еси Единому, Богоглаголиве, Богу поклоняться в Троице, Зиждителю всех видимых же тварей и невидимых, мученическим же украсился еси венцем.

Богородичен: **Б**листай Ты Ангел предста и лучами девства Твоего вельми просветися, себе самага яко свойственныя забы славы, еже радуйся, со страхом Тебе вещаше.

Стихиры, глас 1.

Подобен: Небесных чинов:

Священства благодать, отче, прием, * Божественными учении просветил еси вся, * Исполите Богомудре, * и священными списаньми истолковал еси * пророков Божественная словеса, * уясняя нам яже отгуду бывающая.

Исповедания Божественным венцем украшаемь, * каплями твоих кровей * священства одежду украсил еси, * весь светел и красен предстал еси Царю и Владыце и Творцу, * всеблаженне Исполите.

Яко дерзновение, всеблаженне, * ко Спасу Христу ныне стяжав, * вся, верно ты чтущия, спасай * от бед, и напастей, и лютых обстояний, * и от страстей, и падений, и нужд * благоприятными молитвами твоими.

Слава, и ныне, Богородичен:

Жезлом Твоего заступления, Богородице Чистая, * зверския страсти окаянные души моя отжени, * отсюду мирно к жизни мя наставляющи, * и святому мя стаду избранных Твоих овец сопричти.

НА УТРЕНИ

На Бог Господь: тропарь святых, глас 4:

Яко апостолов единомравнии * и вселенных учителяе, * Владыку всех молите * мир вселенной даровати * и душам нашим велию милость. [Дважды]

Слава, и ныне, Богородичен.

Еже от века утаенное, * и ангелом несведомое таинство: * Тобою Богородице сущым на земли явился Бог, * в неслитном соединении воплощаемь, * и крест волею нас ради восприим, * имже воскресив первозданного, * спасе от смерти души наша.

По 1-й кафизме седален, глас 5.

Подобен: Собезначальное:

Яко царское украшение Церкви, Василия вси восхвалим, * догматов сокровище неоскудеемо, * сими бо сам наказа нас Троицу чествовати Святую, * соединену убо Существом, разделену же Ипостасьми.

Слава, глас 4.

Подобен: Скоро предвари:

Светильницы пресветлии Церкви Христовы, * мир просветисте ученьми вашими, отцы Богомудрии, * изсушивше ереси всех злославных * и угасивше пламеновидная хульных смущения. * Темже, яко святители Христовы, молитесь спастися нам.

И ныне, Богородичен:

Дево Всепетая, Мати Христа Бога, * Марие Богоневесто и Неискусобрачная, * верных предстательство, * избави от всякия беды и всякия нужды, Владычице Богородице, * верою и любовию покрову Твоему прибегающия, * Единая Богоневестная.

По 2-й кафизме седален, глас 3,

Подобен: Божественныя веры:

Столп был еси Церкви, * богатство некрадомое благочестия явился еси, Богослове Григорие, * в безстрастии осиял еси житие твое * и Тройчеськия изъяснил еси догматы. * Отче преподобне, Христа Бога моли о спасении душ наших.

Слава, глас 4.

Подобен: Удивися Иосиф:

Во цветнице писаний, якоже пчелы мудрыя, прилетающе, * вы объясте добре, и от цветов изряднейшая, * и мед всем верным учений ваших представисте вкупе во всенаслаждение их, * и сего ради всяк наслаждающийся с веселием зовет: * предстаните паки и по смерти иже вас восхваляющим, блаженнии.

И ныне, Богородичен:

Треволнениям страстей безсовестный аз обуреваемь, Пречистая, * призываю Тя тепле, да не презриши мя, окаяннаго, погибнути, * бездну милости рождающая: * разве бо Тебе, иныя надежды не имам. * Да не убо врагом обрадование и смех, * надеявся на Тя, явлюся, * ибо можеша, елика и хоцеша, яко Мати сущи всех Бога.

По полиелеи седален, глас 4.

Подобен: Явился еси:

Премудрии учителяе вселенных, * иже Бога прославльшии дела и словеса на земли, * да возвеличатся днесь, яко спасения нам суще ходатаи.

Слава:

Празднует днесь Церковь честное торжество учителей триех, * ибо тии утвердиша Церковь Божественными своими догматы.

И ныне, Богородичен:

Предстательнице неборимая оскорбляемых * и теплое заступление уповающих на Тя, * от бед мя избави: * Ты бо еси всех помощница.

Таже степенна, 1-й антифон 4-го гласа.

Прокимен, глас 4: Священницы Твои облечутся в правду, * и преподобнии Твои возрадуются.

Стих: Уста моя возглаголют премудрость, и поучение сердца моего разум.

Всякое дыхание:

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажитъ обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник ест и нерадит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

По 50-м псалме стихира, глас 6:

Излияся благодать во устнах ваших, * преподобнии отцы, * и бысте пастырие Христовы Церкви, * учаще словесныя овцы * веровати в Троицу Единосущную * во Едином Божестве.

Канон Богородицы со ирмосом на 6, глас 2, и святых два канона на 8. Иоанна Евхапта.

Песнь 1

Ирмос: Грядите, людие, поим песнь Христу Богу, * раздельшему море и наставльшему люди, яже изведе из работы египетския, * яко прославися.

Благочестно Тя, Чистую Богородицу, истинно исповедающаго, Пречистая, душею и телом, от лютых бед, и недугов, и прегрешений Ты мя спаси.

Всю в Тебе дарований бездну лежащу уведехом, темже, прибегающе, Богородице, усердно к покрову Твоему Божественному, спасаемся.

О нас, Тя поющих, Пречистая, моли Воплощеннаго из пречистых и честных Твоих кровей, избавитися от прегрешений и болезней горьких.

Ин канон святых, егоже краегранесие: Трисолнечнаго Света три возвышаю солнца. Творение тогоже Иоанна.

Песнь 1. Глас и ирмос тойже.

Кое благодарение, кое противовоздаяние, подобающее нашим, человецы, принесется от нас благодетелем, имиже ко еже добре быти наставляемся?

Витийстии языцы, и хитрости, и коварства, и вся словес сила ныне в вину да сподвигнутся едину и, чувствуяще взаим, да почтут.

Свойственного убо им не терпящу, дабы что стяжати на земли, Небомудреннии, хранителие же явишася общества и предстателие, общих убо и похвал да сподобятся.

Богородичен: Тя, общее любочестие, Всенепорочная, нашего естества, вси славим, уста едины бывше и едино согласие совершивше.

Другий канон святых. Творение тогожде, глас 8.

Ирмос: Колесницегонителя фараоня погрузи * чудотвори и иногда * Моисейский жезл, крестообразно поразив * и разделив море, * Израиля же беглеца, пешеходца спасе, * песнь Богови воспевающа.

Не человеческого тщания исправление сие начинание, но Твоему престолу приседящая, Человеколюбче, Премудрость да споспешествует ми, слова благодать дающи, еуже прославити возмогу, ихже сама добре предпрослави.

Якоже чаща, преисполняется, Владыко, благодать Твоя, и многое богатство человеколюбия Твоего излиется и потече, якоже и ины Ангелы в составе плоти показати, ныне предлежащая в похвалу.

С Небесе Небесным подобаше быти и похвалам, Ангельское пение, Божественным прилично: бози бо причастием, иже естеством и Единого истинного Бога имуще в себе, живуща и вещающа.

Богородичен: Память преподобных Богомудрое сословие с похвалами совершает, с нимиже и Божия Матерь, яко тех глава, в лепоту прославляется, конечный, и первый, и средний чин содержащи и благохваления причащающися.

Катавасия: Сушу глубородительную землю:

Песнь 3

Ирмос: Утверди нас в Тебе, Господи, * Древом умерщвлей грех, * и страх Твой всади * в сердца нас, поющих Тя.

Молитвами Твоими, Чистая, Бога, Егоже родила еси, подаждь благопремнна Твоим рабом, притекающим к покрову Твоему и верно поклоняющимся Твоему Рождеству.

Всю мою жизнь окорми, Дево, упование мое и Предстательнице, искушений и обстояний избавляющи лютых мя, Приснодево.

Премудрость Божию Ипостасную на объятиих яко понесши, Богородице, от неведения и заблуждения избавитися поющим Тя моли.

Ин

Ирмос: На камени мя веры утвердив, * расширил еси уста моя на враги моя, * возвесели бо ся дух мой, внегда пети: * несть свят, якоже Бог наш, * и несть праведен, паче Тебе, Господи.

Труба великая Церкви, светильник, просвещающий вселенную, проповедник, вещанием объемляй вся концы, великоименитый Василий сподвизает собрание сие.

Светел от жития и вещей, светел от словес и учений, во всех пресиявая паче всех, якоже другое паче звезд солнце, многопетый Богослов днесь блажится.

Се свет мира миру светит, се земли соль землю услаждает, се древо жизни безсмертия плоды предлагает, Златоустый святой. Иже умрети не хотящи, приидите, наслаждайтесь.

Богородичен: Вся от небытия в бытие Сотворивый и естество Давый коемуждо бывших, Тойже и данная естества прелогати весть, якоже хочет, Отонудуже и слышимо есть, яко и Дева рождши, кто не удивится?

Ин

Ирмос: Утверждей в начале Небеса разумом * и землю на водах основавый, * на камени мя, Христе, заповедей Твоих утверди, * яко несть свят, паче Тебе, Едине Человеколюбче.

Иже нравов исправителие и душ строителие, спасителие общии всех, иже и деяний нам и словес образы показавше, наказателие жития светлии, светле да восхвалятыся.

Дух Божий исполни Василия художества; огненных же имяше языков един Григорий и огнем высокоречия дхне; Христова же уста во Иоанне глаголаху.

Нынешняго века мудрость буйство проповеди яве упражняемую имать, повинующуюся ему и рабски служащую: проповедники бо благодать мудрыя предлагает риторы.

Богородичен: Во утробе Чистыя Девы Вселивыйся души Богоносных святых жилище творит и оных устнами еже о Матери сказует таинство.

Катавасия: Утверждение на Тя надеющихся:

Седален, глас 8.

Подобен: Премудрости:

Великия светильники светозарныя, * Церкви столпы неразоримыя согласно да восхвалим, * иже добрых наслаждающиися * и словес тех, купно и благодати: * премудраго Златоглаголива и Великаго Василия * с Григорием светлым Богословом. * К нимже и возопиим, от сердца зовуще: * святителие тревеличайшии, молитесь Христу Богу * прегрешений оставление даровати празднующим любовию святую память вашу.

Слава:

Премудрость приемше от Бога, яко апостоли инии трие Христовы, * словом разума составляете догматы, * яже прежде словесы простыми низлагаху, рыбарие в разуме силою Духа, * подобаше бо тако простей нашей вере составление стяжати. * Отнюдуже вси вопием вам: * молитесь Христу Богу прегрешений оставление даровати * празднующим любовию святую память вашу.

И ныне, Богородичен:

Душу мою, Дево, смиренную, * бурею жития искушений ныне яко кроме управления бывшую, * потопляемую волнами, грехов бременем явльшуся преисполнену * и во дно адово приити бедствующу, * предвари, Богородице, молитв Твоих милостию, * тишину подаючи и бед изымаючи. * Пристанище бо Ты еси небурное, * молящися Сыну Твоему и Богу * прегрешений оставление даровати ми: * Тя бо имам надежду, недостойный раб Твой.

Песнь 4

Ирмос: Услышах, Господи, * слух Твоего смотрения * и прославих Тя, * Еди́не Человеколю́бче.

Язв моих душевных, Владычице, и плотских недугов, Бога рождающая, разрешение подаждь ми.

От обстояния избави мя, Мати Божия, и бури, и бед Твоими молитвами, Еди́на Всепетая.

Обуреваема волнами житейскими исхити, Дево, ко Твоему пристанищу наставляюща мя.

Ин

Ирмос: Пришел еси от Девы, * не ходатай, ни Ангел, но Сам, Господи, воплощся, * и спас еси всего мя, человека. * Тем зову Ти: слава силе Твоей, Господи.

Разумливы от нижня мудрости бывше, правление, преславнии, от Божественных стяжасте, темже, яко рабыню, сию оной всемудре покористе.

Любомудрии, мудрыя аще любите, умудритесь и глаголати научитесь вси, иже словесем чюдящихся, деяния опасству и видения отгуду обучающесе.

Богородичен: Яко позднен дождь, напоследи бывый, утренний, вод и веков Содетель, во чрево Твое уканув, Всенепорочная, во время прохлаждаая оскудевающа.

Ин

Ирмос: Ты моя крепость, Господи, * Ты моя и сила, * Ты мой Бог, Ты мое радование, * не оставль недра Отча * и нашу нищету посетив. * Тем с пророком Аввакумом зову Ти: * силе Твоей слава, Человеколю́бче.

Столп огнен, людем верным предварающий и опаляющий враги веры, племена же спасаая, известно последующия, Великий явися Василий, да дерзает и побеждает Христова Церковь, толиким обогатившиися поборником.

Языка сладость и слуха всякаго услаждение, твое слово бысть, Григорие, манна жизни, роса сладкости, мед, иже из камене, Ангельский хлеб Небесный, несытно насыщатися услаждения его увещеая и исполняяй сладости причащающияся.

Река дарований духовных наполни даже и до разлития, и доброе лице земли, яко сладостный поток, от златых напаяет уст, веселящи и утучняющи Христов всякий град Божественных волн струями.

Богородичен: Естество, просто стерпевшее сложению и явльшееся вышше слития в Твоем, Владычице, Сыне, трие Богоноснии учителя исповедаша, от двою волю и сугубаго действия, сугуба по естеству проповедавшие.

Катавасия: Покрыла есть Небеса:

Песнь 5

Ирмос: Света Подателю * и веков Творче, Господи, * во свете Твоих повелений настави нас: * разве бо Тебе, иного бога не знаем.

Оружие непобедимое на различная искушения вражия имущее, всякаго враждебных озлобления избавляемсе присно, иже Тя, Богородицу Чистую, ведущии.

Закона исполнение, яже вышшая Херувимов, родила еси Божия из Тебе воплощенна Сына Единородна, Егоже о рабех Твоих умоли.

Всяческих Творца на руку Твоею понесши, Сего нам Твоими молитвами благоприменна давай, ныне от сердца к Тебе прибегающим.

Ин

Ирмос: Просвещение во тьме лежащих, * спасение отчаянных, Христе Спасе мой, * к Тебе утреннюю, Царю мира, просвети мя сиянием Твоим: * иного бо, разве Тебе, бога не знаю.

Ты источник Твоих дарований испити весьма, Человеколюбче, дал еси святым, умален никакоже истощанием, мир же весь упоив иже от чрева их Божественными потоки.

Что ми злато? Что ми богатство, и слава, и могущество? Дымове, расходящиися по воздуху: вся да исчезнут, вся да преносит ветр. Мне богатство едино многорачительно – учителей троица витийствующая.

Точит река нетленную пищу и Божественное питье, точит алчущим безсмертное брашно и жаждущим нетленное питье, вода жива во веки и содержащая живы пиюция: вси многотекуция жизни насытитесь.

Богородичен: Имяше крепость на ны злоба, но не в конец: изнеможе бо по Деве, в крепости Сильнаго рождашей, подъемшаго плотскую немощь и сильнаго в злобе умертвивша.

Ин

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго? * Но обрати мя и к свету заповедей Твоих * пути моя направи, молюся.

Иже Божественных вещей и человеческих мудрья хитрецы, иже сущих естества любостинне яве нам известившия и Зиждителя тех всем сказавшия яко лепо, благодарными гласы восхвалим.

Горькое и терпкое яже ко спасению лечеб усладиша мудрыми словес ученьми же, и хитростьми, и благодатьми, душ Божественнии лечителие: наслаждайтесь, вси благочестивии, и, красуеми, спасайтесь.

Молчит всяко слово, Богопроповедником глаголющим Божественная, и удержавает над Ветхим заветом Новый, предлагающий честныя скрижали, иже в нем законополагающих, к нимже причитается все верных сословие.

Богородичен: Безсмертное естество смертное претече во святыню, и Дева Отроковица безплотныя Ангелы превзыде, яко Бога рождающая, Царя Ангельскаго, на Негоже зрети онем невозможно.

Катавасия: Яко виде Исаия:

Песнь 6

Ирмос: В бездне греховней валяясь, * неизследную милосердия Твоего призываю бездну: * от тли, Боже, мя возведи.

Спасения пристанище ведый тя, плавая многопечального жития пучину, призываю Тя, Владычице, Кормчая души моей буди.

Чистаго жития отпадох ленью, окаянный, но возведи, Благословенная Всечистая, повелением Сына Твоего сочетавши.

Милости Твоей, Богородице, сподоби мя, премилостиваго Слова порождающая, Иже Своєю кровию от тли человеки избавльшаго.

Ин

Ирмос: Бездна мя многа греховная окружает, * и вопию Ти, пророка подражая: * от тли мя, Господи, возведи.

Свойства в Троице три сбогословите: нерождение Отца, Слова же рождение и Духа исхождение Самаго.

Днесь дому сему светоявленное спасение: два бо и три собранныя Христос, во Имя Свое почествуяй, посреде присутствует сих.

Неиспытанна земная глубина к Небесной высоте, но от земли святяга вознесе вышше небес Небесное желание.

Богородичен: Нов Тя источник, Дево, и вину таин имуща, трие Богоглагольницы новыми предложеньми новолешное приличествуют наречение.

Ин

Ирмос: Очисти мя, Спасе, многа бо беззакония моя, * и из глубины зол возведи, молюся: * к Тебе бо возопих, и услыши мя, * Боже спасения моего.

Троицу единственную богословити научихомся, Единицу Троичну ю пети прияхом, покланятися навыхомом от отцев Единому Естеству Триипостасному.

Слово бе в начале, ко Отцу Собезначальное, и Дух Божий Бог бе Прбезначальный, просто, единосущно, соестественно Божество, яко Божественнии глаголют проповедницы.

Совокупляю, и разделяю, яже совокупленне разделяемая, Едино Нераздельно помышляю и Три мно: учителя приемлю три Богоносныя, тако увещевающия мя веровати.

Богородичен: Безматерний прежде плоти, безотчий же по воплощении, Сын Отчий и Матерний, иже сия нарицай паче ума обоя: Богу бо подобают чудес преславная.

Катавасия: Возопи к Тебе:

Кондак, глас 2.

Подобен: Твердыя:

Священныя и Боговещанныя проповедники, * верх учителей, Господи, * приял еси в наслаждение благих Твоих и упокоение: * труды бо оных и смерть приял еси паче всякаго всеплодия, * Едине, прославляяй святяга Твоя.

Икос: Кто доволен своя устне разверсти и подвигнути язык к дышущим огнем силою Слова и Духа? Обаче толико рещи дерзну: яко все преидоша человеческое естество сии трие многими и великими дарованьми, деянием же и видением, по обоему светлы превозшедше. Темже зело великих даров тыя сподобил еси, яко верныя Твоя служители, Едине, прославляяй святяга Твоя.

Песнь 7

Ирмос: Образу златому, на поле Деире служиму, * трие Твои отроцы небрегоша безбожнаго веления, * посреде же огня ввержени, орошаеми, пояху: * благословен еси, Боже отец наших.

На Кресте пригвождя, Иже из Тебе Воплотивыйся, Богородительнице, Адамово раздра рукописание. Егоже ныне моли, Всенепорочная, всех бед избавитися верою зовущим: благословен еси, Боже отец наших.

Надежда благая, Заступница же верных еси, Владычице, и ныне молимся Тебе, даровати сострадательства пучину всем, на Тя уповающим и Сыну Твоему зовущим: благословен еси, Боже отец наших.

Красною одеждею спасительных заповедей, крещением одеаяся, оскверних леностию, окаянный, ныне же Ти притекаю, Дево, одеждею прося веселия Тобою паки облещися.

Ин

Ирмос: Богопротивное веление * беззаконнующаго мучителя высок пламень вознесло есть, * Христос же простре Богочестивым отроком росу духовную, * Сый благословен и препрославлен.

Побеждается, блаженнии, и отбегает яже прежде непостоянная дерзость ересей: воск же, растаяваемый от лица огня, любоденчное всякое учение показуется, вашим приражающееся огнедохновенным вещанием.

Аживых убо уклонишася еллинских бусловий, увещание же томительство, еже в человецех, едино избраша, под нимже истину сии трие утвердивше, сице весь сонм верных побеждают словесы и увещевают.

Богородичен: **В** Тебе всяко проречение воспочи и конец прияше удивляющее глаголющая: из Тебе же светлее и проречений чудеса точат, Чистая, мудрая являюща сказатели.

Ин

Ирмос: Божия снизхождения * огонь устыдеса в Вавилоне иногда, * сего ради отроцы в печи, радованною ногою, * яко во цветнице, ликующе, пояху: * благословен еси, Боже отец наших.

Молчашии и зовущии, видимии же и слышимии, добродетели и мудрости, Богоглаголивии, столпы быша, делом и словом вопити повелевающе: благословен Бог отец наших.

Божия гласы, свыше возгремевшия нам пречудно, молнии же лучи, иже ваша вещания приемлюще, всемудрии, купно убо поем с вами: благословен Бог отец наших.

Испущени будут гради от каменопращных языков, сокрушающии гнилая учений, аще кто посреде дерзнет суесловников, правая не вещь: благословен Бог отец наших.

Богородичен: **В** Тя, Дево, вселися и по рождестве Деву остави Иже устраяяй стихии и претворяяй естества, якоже хочет, Богородительнице Марие. К Немуже вопием с Тобою, Всенепорочная: благословен Бог отец наших.

Катавасия: Тебе во огни:

Песнь 8

Ирмос: **В** печь огненную ко отроком еврейским снизшедшаго * и пламень в росу предложшаго Бога * пойте, дела, яко Господа, * и превозносите во вся веки.

Столп крепости тверд, и степень, и Хранительницу, и Предстательницу стяжавше Тя верою, спасаемся ныне. Поем Рождество Твое, Пречистая, и превозносим во вся веки.

Безсмертия прозарный вемы Тя источник, Богородице, яко рождшую Слово безсмертнаго Отца, Еже вся от смерти избавляющее, превозносяция Его во веки.

Струю исцелений нам всегда, верным, точиши, еяже независтную благодать вземлюще, ныне воспевает Рождество Твое, Пречистая, и превозносим во вся веки.

Ин, ирмос тойже.

Разумеваем благочестно и прославляем единократно Едино Естество, безмерномогущую Единицу же и Троицу, вся сия словеса правящую лучшими. Тако бо славити трие Богоноснии предаша, с нимиже покланяемся Ей во веки.

Соединишася трие Богопроповедницы, соединивши Троицу и Нераздельное во всех соблюдшии, Божественным естеством: едину от Тоя восприяша нераздельную славу, в похваление едино созывающую превозносяция Ю во веки.

Богородичен: Прием, еже по нам, воздав же Свое Благодетель, содея токмо, не пострада же, Дево: творит бо, но не в тление устрояет, паче же и стражда волею, страстию страсти решит, якоже трие отцы нас тайноучат.

Ин

Ирмос: Седмерицею пещь * халдейский мучитель * Богочестивым неистовно разжже, * силою же лучшею спасены, сия виде, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Яже Бог соедини в единократнем единении, похвалитель да не разлучает человек, но равны непщующа в техже дарованиях, равных и пеней песнопояй да сподобит: отроцы, благословите, священницы, воспойте, людие, превозносите во вся веки.

Сильнии и непоборимии Божества споборницы и истины неживии споспешницы, глубины Духа добре испытавши, Боголепная о Бозе разумения отгуду составляют и учат пети: людие, превозносите Христа во вся веки.

С Небесе убо величайшая два светила просвещают по преемству друг друга подсолнечную; от земли же светлее всю вселенную озаряют три по тому же превеликая светила, светяще с друг другом и поюще купно: людие, превозносите Христа во веки.

Богородичен: Нас ради воплощение и страсти честныя, нас ради Бог с мертвыми бысть, смерти убо невкусен, яко страстей свободен, к плоти же смертней общением глаголемый, и страсти причастися, и смерти, с неюже превозносим Христа во веки.

Катавасия: Нестерпимому огню:

На 9-й песни Честнейшую: не поем, но поем припев:

Величай, душе моя, * Честнейшую Небесных воинств, * Деву Пречистую Богородицу.

Таже ирмос. Посем тойже припев поем и к прочим Богородичным тропарем.

Песнь 9

Ирмос: От Бога Бога Слова, * неизреченною мудростию пришедшаго обновити Адама, ядию в тление падшаго люте, * от Святыя Девы неизреченно воплотившагося нас ради, * вернии, единомудренно песньми величаем.

Богоблаженная Отроковице, надежду мою всю усердно возлагаю на Тя: спаси мя, Мати истинныя Жизни, и сладости присносущныя насытитися моли, Чистая, верою и любовию Тя песньми величающа.

Явльшися, Дево, дверь Божественнаго Света, души моя мрак Света Твоего невественными блистаниями озари и вечнаго огня избавитися мне умоли, Чистая, верою и любовию Тя песньми величающему.

Во чрево Твое вселися, Егоже из чрева прежде веков Отец роди Сына, совершен бысть Человек, и источник дарований Тя, Богомати, показа нам, верно поклоняющимся несказанному Твоему Рождеству.

Ин

Ирмос: Безначальна Родителя Сын, Бог и Господь, * воплощся от Девы, нам явися, * омраченная просветити, собрати расточенная. * Тем Всепетую Богородицу величаем.

К канонем же святых на кийждо тропарь поем припевы сии:

Величай, душе моя, во иерарсех светила три великая.

Се ваше делание и паства, за юже величайшия болезни претерпесте, во едино сошедшеся, купно же три вы соприемше, общую имать похвалу ваше сладчайшее соединение.

Величай, душе моя, тридесятьныя Христовы Церкви.

Не обоюдоострый меч благодать, но треострый на ратников тоя предлагает: един небокованен меч, тремя крепостьми изошрен, присно поборствуяй по Трисиянном Едином Божестве.

Величай, душе моя, просвещающия Христову Церковь.

Ваше жительство на Небесех бяше, преславнии, и плоть носящих во веки нескверну, в нихже всесовершенно ныне живуще, сущим на земли нам пребывающим Вышняя молите и мыслити, и деяти.

Величай, душе моя, Честнейшую Небесных воинств, Деву Пречистую Богородицу.

Богородичен: Теснит мя широта Твоих величий, Владычице, подавляюще слово от частости, и преславно ми случается еже недоумеватися от благомощества, темже толико Тя Возвеличившаго славим.

Ин

Ирмос: Ужасеся о сем Небо, * и земли удивившася концы, * яко Бог явися человеком плотски * и чрево Твое бысть пространнейшее Небес. * Тем Тя, Богородицу, * Ангелов и человек чиноначалия величают.

Величай, душе моя, Пресвятыя Троицы три пастыри.

Возвысися Троичная добродетель и всяческая славы исполни, иную лучу нам возсиявши трисветлу, яко свое осияние, Небесныя тайноводители, имиже на Божественное оныя видение, благочествующе, наставляемся.

Величай, душе моя, от Трисолнечнаго Светила три великая.

Не есть вторство в триех сих, старейшинства бо кийждо их носит, первый не сый, и единочестныя превышшая: присвоят же паче друг друга победу прерадостно, не вмещается бо zde зависти дерзость, растлевающия единомыслие.

Величай, душе моя, Трипостаснаго и Нераздельнаго Божества державу.

Отцев благочестие, своя первородныя сыны показавшее, чада возраждает свету присная и непорочная теми, совершаемая Духом, жизнь глаголавшим в них, и цел соблюдати испрошает до конца мир, егоже от них наследствова.

Величай, душе моя, Честнейшую Небесных воинств, Деву Пречистую Богородицу.

Сына Бога живаго мудрых учителей верх проповеда, Твоего Сына, от откровения Отча, не от плоти и крове сие тайноуедава, Мати Божия. Темже Тя и Деву прославив, Матерь и Богородицу возвеличи.

Катавасия: В законе сени и писаний:

Светилен.

Подобен: Свете неизменный:

Три светозарныя светильники, паче солнечных луч * от Светоначальныя Троицы и Трисолнечныя Единицы, * преестественно смешены, * Богоносныя восхвалим отцы.

Слава:

Подобен: Небо звездами:

Света приятелища, светолучныя молнии, * Василия ныне Великаго, Григория Богослова, Златоустаго Иоанна, * да восхвалим вси.

И ныне:

Единственное Божество, Отче, Сыне и Душе, * мольбами Василия, Григория и Иоанна и Пречистыя Богородицы * да не отлучуся Твоя славы.

На хвалитех стихиры, Глас 5. Нила Ксанфопула.

Подобен: Радуйся:

Радуйся, святителей троица, * Церкви великая забрала, * столпи благочестия, верных утверждение, * еретичествующих низпадение, * Христовы упасшии люди Божественными учении * и различными добродетельми воспитавшии, * благодати яснии проповедницы, * законы произложившии Христову исполнению, * вожди к Вышним, райстии входы, * Христа умолите * низпослати душам нашим велию милость. [Дважды.]

Радуйся, святителей троица, * небошественнии земнии Ангели, * мира спасение, человеков радость * и вселенныя учителя, * Слова поборницы, * врачеве премудрии недугов душевных и телесных, * приснотекущия реки духовныя, * словесы напаяющии земное все лице, * Богословнии степени, златослови Божественнии, * Христа умолите * низпослати душам нашим велию милость.

Радуйся, святителей троица, * земныя тверди солнца, * лучи и светила от Трисолнечнаго озарения, * помраченныя прозрение, * цветы благовоннии рая краснейшии, * Богослове, мудрый же Василие, Златоусте, * дщицы Духа, скрижали Богоначертанныя, * сосцы, источающии спасения млеко, * мудрости украшение, * Христа умолите * душам нашим даровати велию милость.

Слава, глас 5:

Вострубим трубою песней, * да ликовствуим празднственная и възграем, радующеся, * в пречестное торжество учителей наших. * Святителие и людие да стекутся и восплецут в песнях, * яко учений источившия реки превеликия три, * доброточныя присноживотныя Духа * пастырие и учителя, * Пречестныя Троицы трегубыя священнотаинники, * сошедшеся, да восхвалим. * Философи – мудрыя, иереи – пастыри, * грешницы – предстатели, нищии – обогатители, * сущии в скорбех – утешители, * путницы – спутешественники, * иже в мори – кормчии * и вси, иже везде тепле предворяющия, * Божественныя архиерархи похваляюще, тако рцем: * пресвятии учителяе, * потщитесь изъяти верныя от житейских соблазнов * и избавити вечных мук молитвами вашими.

И ныне, Богородичен. Германа Патриарха:

Вострубим трубою песней, * преклоншиися бо свыше, Всецарица Мати Дева * благословенными венчавает воспевающия Ю. * Вернии людие да стекутся * и Царицу да восплецут в песнях, * Царя рождшую, * смертию одержимыя первее разрешити человеколюбно благоизволившаго. * Пастырие и учителя, * добраго Пастыря Пречистую Матерь, сошедшеся, да восхвалим, * свещник златозарный, светоносный облак, * Небес пространнейшу, * одушевленный же кивот, огнезrachный Владычень престол, * манноприемную златую стамну, * заключенную Слова дверь, * всех христиан прибежище, * песнями Богоглаголивыми похваляюще, сиче рцем: * палато Слова, * сподоби смиренных нас Небеснаго Царствия, * ничтоже бо невозможно ходатайству Твоему.

Славословие великое и отпуст.

НА ЛИТУРГИИ

Блаженны от канона 1-го песнь 3-я и от канона другаго песнь 6-я.

Труба великая Церкви, светильник, просвещающий вселенную, проповедник, вещанием объемляй вся концы, великоименитый Василий сподвизает собрание сие. [Дважды.]

Светел от жития и вещей, светел от словес и учений, во всех пресиявая паче всех, якоже другое паче звезд солнце, многопетый Богослов днесь блажится.

Се свет мира миру светит, се земли соль землю услаждает, се древо жизни безсмертия плоды предлагает, Златоустый святой. Иже умрети не хотящии, приидите, наслаждайтесь.

Троицу единственную богословити научихомся, Единицу Троичную пети прияхом, поклонятися навыхом от отцев Единому Естеству Триипостасному.

Слово бже в начале, ко Отцу Собезначальное, и Дух Божий Бог бже Пребезначальный, просто, единосущно, соестественно Божество, яко Божественнии глаголют проповедницы.

Слава: **С**овокупляю, и разделяю, яже совокупленне разделяемая, Едино Нераздельно помышляю и Три мною: учителя приемлю три Богоносныя, тако увещевающия мя веровати.

И ныне: Богородичен: **Б**езматерний прежде плоти, безотчий же по воплощении, Сын Отчий и Матерний, иже сия нарицай паче ума обоя: Богу бо подобают чудеса преславная.

Тропарь святых, глас 4:

Яко апостолов единоправнии * и вселенныя учителя, * Владыку всех молити * мир вселенней даровати * и душам нашим велию милость.

Кондак святых, глас 2.

Священныя и Боговещанныя проповедники, * верх учителей, Господи, * приял еси в наслаждение благих Твоих и упокоение: * труды бо оных и смерть приял еси паче всякаго всеплодия, * Едине, прославляяй святых Твоя.

Прокимен, глас 8: Во всю землю изыде вещание их, * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Апостол ко Евреям, зачало 334.

Братие, поминайте наставники ваша, иже глаголаша вам слово Божие, ихже взирающе на скончание жития, подражайте вере их. Иисус Христос вчера и днесь тойже, и во веки. В научения странна и различна не прилагайтесь, добро бо благодатию утверждати сердца, а не брашны, от нихже не прияша пользы ходившии в них. Имамы же олтарь, от негоже не имут власти ясти служащии сени. Ихже бо кровь животных вносится во святая за грехи первосвященником, сих телеса сжигаются вне стана. Темже Иисус, да освятит люди своею кровию, вне врат пострадади изволил. Темже убо да исходим к нему вне стана, поношение его носяще. Не имамы бо zde пребывающаго града, но грядущаго взыскуем. Тем убо

приносим жертву хваления выну Богу, сиречь плод устен исповедающихся имени Его. Благодворения же и общения не забывайте, таковыми бо жертвами благоугождается Бог.

Аллилуия, глас 4: Исповедят Небеса чудеса Твоя, Господи.

Евангелие от Матфея, зачало 11:

Рече Господь Своим учеником: вы есте свет мира, не может град укрытися верху горы стоя. Ниже вжигают светильника и поставляют его под спудом, но на свещнице, и светит всем, иже в храмине суть. Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. Да не мните, яко приидох разорити закон, или пророки: не приидох разорити, но исполнити. Аминь бо глаголю вам: дондеже преидет небо и земля, иота едина, или едина черта не преидет от закона, дондеже вся будут. Иже аще разорит едину заповедий сих малых и научит тако человеки, мний наречется в Царствии Небеснем, а иже сотворит и научит, сей велий наречется в Царствии Небеснем.

Причастен: Радуйтеся, праведнии:

* * *

МОЛИТВА

О пресветлии светильницы Церкви Христовы, Василие, Григорие и Иоанне, светом православных догматов вся концы земли озарившии и мечем слова Божия хульных смущения и шатания ересей угасившии! Припадающе к вашему милосердию с верою и любовию из глубины души вопием: предстояще престолу Пресвятыя, Единосущныя, Животворящия и Нераздельныя Троицы, за Нюже словом, писанием и житием добре подвизастеся и души своя полагасте, всегда молитесь Ей, да укрепит и ны в православии и единомыслии, и непоколебимем даже до смерти исповедании веры Христовы, и во вседушевнем послушании Его Церкви Святей; да препояшет ны с высоты силою на вся невидимыя и видимыя враги наша; да соблюдет Церковь Свою незыблему от неверия, суеверия, ересей и раскола; да дарует народу нашему долгоденствие и во всем благое поспешение; пастырем нашим да подаст духовное трезвение и ревность о спасении пасомых, властем суд и правду, воином терпение, мужество и одоление на враги, сирым и вдовицам заступление, болящим исцеление, юным благое в вере возрастание, старцам утешение, обидимым заступление и всем вся, ко временней и вечней жизни потребная, яко да в мире и покаянии, желанием спасения горяще, Господеви работающе, добрым подвигом подвизающеся, течение наше скончаем и сподобимся в Небеснем Царствии купно с вами всегда пети и славити пресвятое и великолепое Имя Отца и Сына и Святаго Духа во веки веков. Аминь.